


Zovins e furlan

numars che a dan sperance



A son nûf su dîs chei che lu capissin, ancje se mancual dal 10% dîs lu scrîf ben

Se no bastin i studis che lu disin di agns incà, o vin vude une gnove conferme di un dât che al è sot i voi di ducj, ancje se tancj lu dinein o a àn miôr sierâ i voi: la lenghe furlane e esist e e je ancjemò ben inlidrisade tes nestris comunitâts. No sarà tant in salût, ma no je nancje muribonde se e lasse olme di se fintremai tai zovins. O fevelin dai risultâts dal ultin scandai curât de Lavagne Plurilengâl, cuntune fotografie linguistiche che e à mostrât a clâr cemût che la lenghe furlane, dopo di chê taliane, e sedi chê plui cognossude e fevelade dai zovins intervistâts, cuntun ûs massim in famee (55,1%), che al cale cui amîs (36,6%) e che al rive al so minim cui compagns di scuele (18,6%). Se o volìn cjâlâ la tace mieze plene, o fevelin dut câs di metât dai intervistâts che al dopre dome o ancje il furlan in cjase, e plui di un tierç dal campion che lu fâs cui amîs. Ancje chi, o vin istitûts plui o mancual virtuôs, cun situazions diversis ma che a metin di solit

insom de liste il Paschini-Linussio di Tumieç e il Magrini-Marchetti di Glemone, e da pît il Marinelli di Udin.

Se o cjalìn lis autovalutazions di competence, plui di 1/3 di lôr al à declarât di capî benon il furlan, e in totâl - tignint cont ancje dal nivel intermedi e principiant - a son adiriture cuasi 9 fantats su 10 che lu capissin; il 75% dal campion al declare ancje une cualchi competence te comprehension de lenghe scrite. Par chel che al tocje il fevelâ, chei che a declarin un nivel avanzât a son dome 2 su 10, ma istès al risulte un bacin di locutôrs che al cjape dentri il 77% dal campion. La situazion plui grivie - ma spietade - e je dal sigûr chê de lenghe scrite: dome mancul di un student su 10 al declare une capacitât ottime di scriture dal furlan (totâl des competencis 61%), e ben 4 su 10 a disin di no savê scrivi gran.

Insome, o vin la conferme che il furlan al è inmò ben presint almancul tant che lenghe passive intune percentuâl une vore alte - che tantis lenghis minorizadis nus invidiin pardabon! - e che duncje no son justificadis lis sieltis di trascurâ il furlan in favôr di un magari 12,3% che al declare di no cognossi cheste lenghe.

Linda Picco

La Patrie dal Friûl - Març 2020